

SCOLA/2

L nef Sorastant Federico Corradini

L an de scola 2020-2021 era tacà de setember con l sostitut Sorastant Claudio Valentini, che aea l'encèria de vidèr per n an la Scola de Fascia, do l penscionament de la professora Mirella Florian, Sorastanta per 12 egn, spetan che la Provinzia endreze l concurs rresservà per cerner la neva figura che posse ge arsecurèr a la Scola de Fascia de jir inant a na vida stabola e segura per 5 egn.

La Jonta PAT aproa ai prumes de firé l bando, che perveit la valutazione per titoi e doi proes a ousc, e ai 7 de oril l vegn publicà sul Boletin de la Region Trentin Sudtiroi con 30 dis de temp per se candidèr.

L concurs vegn metù a jir de messèl e tol pèr trei candidat, duc trei col atestat de cognoscenza del lengaz ladin: Alessandro Turcato, Patrizia Lampis e Federico Corradini. Ai 21 de messèl vegn fora l ejit con la valutazione maora per l professor Corradini e dapò la delibera provinzièla de sia nomina desche nef Sorastant per i 5 egn che vegn.

Corradini l à 43 egn, l é de naa da Fiem ma l é enciasà te Fascia olache l à insegnà talian, storia e geografia te la scola mesènes da 14



L nef Sorastant Federico Corradini à tout su l'encèria da Claudio Valentini.

egn e ti ultimes 12 egn l é stat ence referent de la mesènes de Sèn Jan e Moena.

Laureà en letres e da semper pascionà de storia e cultura de noscia valèdes, l reiona ladin n muie delvers, l se à laurea con na tesi sui artisè de la valèdes de la Veisc.

Col meis de aost Corradini taca n meis de tirocinie e passaje de consegnes col sostitut sorastant Claudio Valentini e col prum de setember l tol te man la redenes del gran istitut scolastich de Fascia, desmostran sobito competenza, capacità e determinazion.